

Parlamentario di MEP, Glenbert Croes

“Nunca mi a spera di ta bek den politica”



ORANJESTAD – Despues di hopi aña pafo di politica, Glenbert Croes t'ey bek, awo como parlamentario di fraccion di Movimiento Electoral di Pueblo. Durante e reunion ayera mainta den parlamento di Aruba BON DIA ARUBA a papia cu Croes kende lo forma parti di e proximo constelacion di Parlamento di Aruba. Manera cu nos tur ta corda, Croes tabata lider di partido OLA, (Organisacion Liberal Arubano) y a fungi tanto como parlamentario y minister pa e partido aki. Awo, na 2013, Croes a aparece como nr. 29 riba e lista di MEP y a sa di gana e confiansa di pueblo, cu a haci cu el a haya un stoel den parlamento. Awe e lo bay huramenta como parlamentario despues di asina hopi aña di ausencia. Awo e trabao mes lo bay cuminsa.

UN SENTIMENTO SPECIAL

Segun Parlamentario Glenbert Croes, esaki ta un sentimento special y feliz, pasobra nunca el a spera cu e lo ta bek den politica. Destino a haci cu e ta bek, e ta sigui conta. Croes a drenta politica y ta forma parti di promocion di credencialnan y awe lo e huramenta. Croes a drenta cu hopi animo, cu un profundo reflexion riba

kico e resultado di e eleccion a nifica como boluntad di e pueblo aki. Pa MEP den oposicion tambe kico lo ta su tarea kico pueblo ta spera di nan, como e oposicion democratico na Aruba y Glenbert ta spera y lo bay ta su compromiso y lo bay ta su lucha, lo bay ta su mision di tur dia, cu e por, den nomber di pueblo pa MEP, cuminsa e caminda cu e trabao y lucha den parlamento y recupera e confiansa di henter e pueblo aki pa asina nan por haci e partido cu e ta representa cu ta MEP, e partido atrobe di henter Aruba.

MANDATO DI PUEBLO

Croes ta drenta parlamento cu humildad necesario pa sa cu e trabao aki cu el a haya ta un trabao a base di un poder cu pueblo como e soberano a mand'e bay haci y e no kier y no lo defrauda e confiansa cu e pueblo Arubiano a brind'e y lo e kier cumpli y lo cumpli cu nan tarea, nan deseo, nan boluntad al pie de la letra, Croes a splica. E ta sigui splica cu e lo defende e interes di nos pueblo, ta alerta y vigilante pa e interes di nos pueblo pa no wordo perhudica den ningun forma, lo bay ta e tarea cardinal. Croes lo desea y cada dia ta testimonio di esey, pa e pueblo sinti den dje y den e

partido cu e ta representa cu ta MEP, cu nan por depende riba dje cabalmente.

DEBATE

Croes a comenta cu MEP lo bay hiba un debate constructivo, firme, pero constructivo. MEP lo bay hiba un debate a base di argumento. Lo bay hiba un debate a base di contenido. Si bin cu un problema, tin cu constata kico e problema ta pa sa kico ta e solucionnan. Lo bay tin diferente opinion riba proposicion y solucion. Segun Croes, tin cu debati riba substancia, pero cu firmesa, cu determinacion, ta critico, firme, pero constructivo. Loke ta hopi importante ta pa laga amor pa nos isla, amor pa nos patria, amor pa nos pueblo, guia nan den e caminda aki pa asina nan por brinda e pueblo aki cu tanto

mester di nan, lo miho di nan esfuersonan, den nan bienestar pa nan felicidad, pa nan desaroyo, pa nan progreso y principalmente nan prepara e Aruba, sigui fortalece Aruba cu mester brinda e cas, e oportunidadnan pa e muchanan, e hobennan, e generacion cu ta lantando, Croes a expresa cu emocion.

UN GLENBERT MADURA

E diferencia ta cu obviamente, tempo cu el a drenta prome biaha cu el a drenta, ta un Glenbert hoben, pero awo e ta un Glenbert madura, cu otro perspectiva y prioridad den su vida personal cu e lo kier laga ta inspiracion. Amor pa su yunan ta su inspiracion, pa e traha duro, pa henter e pueblo aki, sin lubida e ehempel cu su tata, Sr. Betico Croes, a laga atras pa nan tur.